

saojvwoz

Vagwzsangh Gyaeunde

美丽的格桑花

□ Luz Yuzgangh/陆如刚

(ciep geiz gonq)

Gou boux daih'it byaij haeuj ndaw caujoyenz bae yawjgonz vagwzsangh. Vagwzsangh baenz nyup baenz nyup hai youq geh nywjheu, yienghcej dujva lumj makgak nei, mbouj suenq hung, hawj gou roxnyinh geizheih dwg saek vagwzsangh, saekde miz lai yiengh: Miz saekhenj, saekhau, saekmaeq, geij yiengh saek dox-baengh, sawj daengx aen caujoyenz engq gyaeunde maezvunz. Go vagwzsangh ngamq miz geij conq sang, caeuq nywjheu seiqlengq doxbingz. Danghnaeuz mbouj miz gij va neix, mwngz itdingh mbouj haeujsim daengz de ne!

Gyawj yawj vagwzsangh, baenz duj baenz duj va lumj najriu lwgnyaeq nei, dwggyaez dangqmaz. Cozmaj naeuz, dieg caujoyenz baihbak va noix yienj ndaej gig danhdieu, hoeng Yihlah Caujoyenz baengh miz gij vagwzsangh neix daeuj cang, yienjndaej engqgya miz senggei!

Gou maeuq roengzdaeuq fwngz lumhlex duj Vagwzsangh he, sijsaeq uet raemxraiz baihgwnz dujde bae. Duj vagwzsangh miz bet limq va, ganj de youh leg youh iq, lumj goengq yieng nei. Cozmaj raen gou yawj ndaej haeujyinx, byaij gvaq henz daeuj doiq gou naeuz, "gwzsangh" song cih saw neix dwg ciuq yaem Vahcang sij gvaqdaeuq, gij eiqsei de dwg "vuenyungz", "vagwzsangh" hoiz baenz Sawgun couhldwg "vavuenyungz". Cozmaj lij naeuz, yienz naeuz go vagwzsangh yawj hwnjdaeuq gig lengjgengz, hoeng gij sengminghlig de gig ak: Fwn yied na



gij mbaw de bienq ndaej yied heu; rumz yied hung gij ganj de yied maenh; ndit yied haenq gij va de yied angj. Seizdoeng, dieg caujoyenz neix cungj ngaiz siet goemq dwk, hoeng bilaeng haicin le, go vagwzsangh ciuqyiengh dok rag fat mbaw yienghgaeuq.

Dingq Cozmaj baenzneix gangj, youh yawjraen ndangdaenj de siuq miz gij va neix, gou sikhaek roxdaengz, youq ndaw lwgda gyoengq beixnuengx Cangcu, vagwzsangh mboujdanh daiyauj gyaeunde caeuq vuenyungz, lij daiyauj yiengh cingsaenz doxgiet mbouj lau haemzhoj he. Vagwzsangh ciengxlwenx angjhai youq ndawsim gyoengqde!

Daengngoengz hwnj sang lo, raemxmok hix ciemhciemh siu gvaq

gizwnq bae, fwj daemq lumj diuz hahdaz nei venj youq gwnz caujoyenz. Dwg dahraix, youq laj ndit, vagwzsangh yienj ndaej engq ronghsag, lumjnaeuz de rox miz hekgyae daeuj caemz nei daegdaengq angjhai dwk. Haxbaenh youq ndaw mok yawj de dwg baenz diemj baenz diemj he, seizneix yawj de dwg cix baenz benq baenz benq he. Va caeuq nywjheu doxgoeb lumjdwg fan damj hung he nei hawj vunz yied yawj yied mizyinx. Gwqhaenx gou fodfwd siengjdaengz bonjsaw 《Dibingzsen Siusaet》, gou nyinhnaeuz, bouxsij mwhde itdingh byaij daengz neix gvaq, de sij gij va haenx itdingh dwg vagwzsangh.

Menh byaij youq gwnz caujoyenz, gou youh geiq ndaej miz aen gojgaeq

ciuhgeq he lwnhnaeuz: Dangzcauz miz dah lwgvuengz he coh heuhguh Vwnzcwnz gunghcu, 16 bi haq bae dieg Duboz(seizneix heuh Sihcang). Mwh aendoih soengqbawx byaij hwnj gauhyenz, vagwzsangh song mbiengj roen lumj roxyiuj nei angjhai dwk, dahlgvuengz raen le sim'angq dangqmaz, dawz gij va neix caemz mbouj dingz. Roxnaeuz dwg yienz-faenh ba, gvaqlaeng, vunz Cangcu soengq hawj dahsau Bouxgun neix aen mingzdaeuz ndei dingq he—— duj vagwzsangh ceiq gyaeu gwnz gauhyenz! Aen gojgaeq neix hawj raeuz rox, vagwzsangh hix dwg daiyauj yiengh minzcu daih doxgiet ndeu, nanzgvaiq seizneix Lahsaz Si dingh vagwzsangh guh yiengh va daiyauj aen si neix! Hekyouz baenz bang baenz doih daengz neix, gak cungj gak yiengh guhcaemz hawj daengx aen caujoyenz nauhyied hwnjdaeuq. Roxnaeuz souh gij yiengh veihvuj maenh, ak saiganghbah yingyangj, gyoengq bouxsai maij gwih max roxnaeuz nyingz naq; hoeng gyoengq saulengj ceiq maij co gij buhvaq boux Cangcu daeuj daenj, dawz bonjfaenh cangguh 'Cozmaj' le caiq byaij haeuj geh vagwzsangh bae ingjsiengq, sau lengj va gyaeu yinx vunz haenh raeuh!

Yaek daengz banringz, Cozmaj coi dou hwnjci bae youz gizwnq, lizhai Yihlah Caujoyenz, gou miz di doeknaiq. Youq ndaw ci gou caeuq Cozmaj iekdingh: Daengz mwh Yangh-gwzlijlah doeng hojceh, gou lij caiq daeuj neix yawj vagwzsangh.

(sat)

Ciuq gij iugouz vunz lai, Swcigih Dangiveij youq bi 1961 ndwen 5 ngoenz 8 hauh youq 《Gij Gvidingh Boujhaeu (Bonjgau)》 Gvendaengz Hengzguh <Gij Diuzlaeh Guh Hong Lajmbanj Yinzminz Gunghse (Bonjgau) >》 ndawde vix ok: "Banh roxnaeuz mbouj banh ranzngaiz, camgya roxnaeuz mbouj camgya ranzngaiz, wnggai cungj youz seyen z gag gietdingh, seyen nyienh banh couh banh, mbouj nyienh banh couh mbouj banh, nyienh camgya couh camgya, mbouj nyienh camgya couh mbouj camgya. Mbouj ndaej dawz banh mbouj banh ranzngaiz, camgya mbouj camgya ranzngaiz daeuj dangguh byauhcu nj bingz seyen z guh hong ndaej ndei roxnaeuz yak caeuq cinbu roxnaeuz doeklaeng. Camgya mbouj camgya ranzngaiz, mboujdanh seyen z aeu gagnyienh, dangjondzyen z ganbu hix aeu gagnyienh."

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz

Mbatneix Veiz Gozcingh caiq daengz Dwngzsiengz, ranzngaiz dox-gungh gaenq deng siu lo. Vunz lai gig rimhoz. De cujau diuhcaz ngeixyaeng baenzlawz diuzcingj nungzyez swng-hcanj diji, hawj vunz lai engq haengjheiq guh hongnaz. Swcigih Nungzyezdingh dinghcanj Se Dungh-laiz caeuq de caez bae, de dwg boux nungzyez conghyah ndeu.

"Lauxse, geij bi neix daeuj raeuz guh saehbamz mbouj noix bw, youq cawgleix aen vwndiz sojyoujci laj-

mbanj neix simmbaeu di lo, bienqdoengh lai, bi 1958 banh gunghse seiz dwg gunghse sojmiz, bi 1960 youh doiq baenz dadui sojmiz, mwngz yawj hengzguh dadui sojmiz dwg mbouj dwg hab lajmbanj swng-hcanjliz mbefat ne?"

"Mbouj itdingh dwg hauhneix, gou yawj vanzlij aeu caiq doiq dem cij baenz!" Se Dunghlaiz gangj vah gig soh, sim baenzlawz siengj bak couh baenzlawz gangj, youq doiqnaj Veiz Gozcingh engq dwg vah gijmaz cungj

gangj.

Veiz Gozcingh hix roxnyinh daengz: Dangqnaj dadui dawz laudungliz, nazreih, doenghduz, hongdawz dingh hawj swng-hcanjdui yungh, doiq swng-hcanjdui hengzguh baucanj baugeng, bau ngaenzgoek, ok haeux mauhgyaq yinvu couh ciengjli aen banhfap "sam bau it ciengj" neix, lumj mbouj ndaej dai goekgaen gaijgez swng-hcanjdui ndawde bingzyaenz cuji haenx.

(caengz sat)